

我與眾生。無始來今。繇愛見故。內計我人。外加惡友。不隨喜他。一毫之善。惟遍三業。廣造眾罪。事雖不廣。惡心遍布。晝夜相續。無有間斷。覆諱過失。不欲人知。不畏惡道。無慚無愧。撥無因果。故於今日。深信因果。生重慚愧。生大怖畏。發露懺悔。斷相續心。發菩提心。斷惡修善。勤策三業。翻昔重過。隨喜凡聖。一毫之善。念十方佛。有大福慧。能救拔我。及諸眾生。從二死海。置三德岸。從無始來。不知諸法。本性空寂。廣造眾惡。今知空寂。為求菩提。為眾生故。廣修諸善。遍斷眾惡。惟願地藏。慈悲攝受。

作是念已。應起胡跪。唱言。

至心懺悔。我弟子（□□）與父母師長、兄弟姊妹、
子女親眷、同修道友等、法界眾生。

自迷法性。枉受輪迴。無明覆心。不知出要。
懷聰明慢。自實愚癡。聞大乘法。謬生空解。
撥無因果。斷滅善根。遠離正信。遠離正願。
離正意樂。及以正見。遠善知識。好處好時。
遠離淨戒。正定正慧。隨逐惡友。起諸邪見。
造身語意。無量罪業。或復毀謗。大乘法。
或復毀謗。獨覺乘法。或復毀謗。聲聞乘法。
障蔽隱沒。不令流布。或復於彼。諸佛弟子。
若是法器。若非法器。具足破戒。下至無戒。
著片袈裟。剃鬚髮者。多行忿恨。訶罵毀辱。
譏刺誹謗。隱善揚惡。以麤惡言。期剋迫懣。